

# YEMESA yana leta

Hida leta Yemesa Yesu taina gi'etoladina. Tauna yana yo'o higa mi'sileli yadi yo'o tuwelo kalivai-dina agaidiya gaveyao Yesu againe hihawahegedi, medema yadi leta gi'etoladina. Keke melala sa'eyana againe tu fafali tulina tulina agaidiya vaita hawahawala amine himiyavehaila, tu bana Yemesa tovetumagana adi yo'o Yelusalema againe himiyami-ma adi tonagona kikaiwabuna. (Afositolo 15:13, 21:18)

Leta ana nuwanuwa ma gava dewa gava dewa tovetumagana gilubodada medema fa'ina gilug'ageyeda, kadu gava'iyamine yada vetumagana yada dewa againe kanaseseyemaunena ma fa'ina gigahevagadona. Vetumagana ana nuwanuwa keke gahegaga, au kadu gugai buye'i. Leta dobona hidede amine.

Lusiule. 1:1

Vemwamwala vita agaidiya kadu vetumaganadona fa'ina. 1:2-8

Vekoyokoyo be vewakalivana fa'ina. 1:9-11

Aladibidibi ana faiwalahegahega fa'ina. 1:12-18

Keke nogalagaga au idibumuhiga buye'i ma. 1:19-27

Kaliva adi italakalakava adi itahobuhobuya fa'ina. 2:1-13

Keke vetumaganagaga au igibagiba buye'i ma. 2:14-26

Meyada ana itave'avina fa'ina. 3:1-18

Babi ana nuwanuwa kadu Setani adi faiwalahegahega fa'ina. 4:1-5:6

Yada wa'atufefa'ila yada wavetumagana kanamiyami. 5:7-20

**1** <sup>1</sup>Iya Yemesa Yaubada kadu Kaiwabu Yesu Keliso ana agetoga omi tovetumagana vaita hawahawala amine fafali tulina tulina agaidiya wamiyavehavehaila-ma ami vesiule! Higa omi mi'sileli yada yo'o tuwelo kalivai-mina.

**Vemwamwala vita agaidiya kadu vetumaganadona fa'ina gilug'ageyedi.**

<sup>2-3</sup> <sup>a</sup>Yo siule tobohiyakweyao, keke gavana fa'ina tu vita adi nauhaga fa'ina ganagahe. Ka'i alaveyaveyafa be vita tulina tulina agaimiya hinalakayemu, au gilubodami be wanavemwamwala-mo'a. Fa'ina yami eda ginavita ana toveya yami vetumagana ana galuvaluva ginanauna-yo guwana atufefa'ila ginakabu. <sup>4</sup> <sup>b</sup>Keke wanagalualuva-yo ami vita

---

<sup>a</sup> 1:2-3 Lo 5:3-5; 1Fi 4:13-14    <sup>b</sup> 1:4 Md 5:48

agaidiya wanakivelivelilimi. Au wanahawahegemi be yami atuvefa'ila ginakabukabu tu nuwanuwa hagihagina tulina tulina agaidiya wanave'asevatu be wanamaga-mo'a, ada au keke tamo gavadi againe wanakali'uho.

<sup>5</sup> Tu hai kaliva agaimiya gavadi Yaubada nuwanuwana unagani ma keke udahalamaneni, giluboda be medema Yaubada againe unave'o'ola be halamana ginavele. Bana'e tonuwadoga ada yana nuwahuya keke ginanuwaloloni kadu keke o fanifani fa'ina ginadakeye, au ginavele. <sup>6</sup> Tu wanave'o'ola againe keke yami wavenuwana au yami wavetumagana wanave'o'ola. Wa'ita, hai kaliva givenuvenuwana, medema vaita lefo lehaga tabone bolimana gilululiyeliyena be gi'alu'alugena-ma amine. <sup>7-8</sup> Bana tonuwaluga, yana nuwanuwa nagona hidedemi muliya wadedemi giseusena, fa'ina bana kalivai-nadi keke anafaiweya gidanuwanuwa gidagayo, "Gavaimi gave'o'ola medemi Kaiwabu ginaveleku."

#### **Koyokoyo be wakalivadiyao fa'idiya gilukahihi.**

<sup>9</sup> Tu hai tovetumagana tu koyokoyo yana lokoloko keke, medema gilubodana be yana vewakalivana Yaubada matane fa'ina ginagakahikahi. <sup>10</sup> Atu hai tovetumagana tu wakalivana yana walokoloko, medema gilubodana be yana giba vaita iyohoyoho Yaubada matane ma gihalamanena fa'ina ginagakahikahi. Fa'ina isisi'u ana falafalawasi gi'akukuwana amine, meda tova kabisona wakalivana ginayawowola. <sup>11</sup> Wa'ita, kauwana gilaka yana lukalalava lakahina againe isisi'u gikabuna be gibou, ana falafalawasi gi'akukuwana ada ana aiwaka gibwavi. Meda anafaiweya bana wakalivana aimo yana giba ana itave'avina againe gi'i'idamodamo tu ginabwavi.

#### **Aladibidibi ana faiwalahegahega fa'ina gilukahihi.**

<sup>12</sup> Hai kaliva aladibidibi ginayemaunina tu yana wa'atuvefa'ila ginafaiwalahegena, medema yana vemwamwala gavatubuga! Fa'ina aladibidibi ginagaluvaluvana be ginafaiwalahegeni-yo tofaiwalahegahega ana badau kikaiwabuna ginavaina, higa yawai-vagahina ginanuhagana. Mena laufatai-nadi Yaubada againe ide gaveyao kanuwanuwa-ma agaideya giwonadabedabena. <sup>13</sup> Aladibidibi ginayemaunida ana toveya, keke gidalubodada be kanagayo, "Hima Yaubada gi'aladibidibiyeku." Fa'ina koyona keke anafaiweya Yaubada gina'aladibidibiyeni-yo ginabe'u, kadu Yaubada keke tamo hakwadi gina'aladibidibiyeni. <sup>14</sup> Aladibidibi

---

c 1:5 1Kin 3:7-12; Md 7:7 d 1:6 Ais 57:20 e 1:7-8 Ye 4:8; Lu 16:13 f 1:9 Ye 2:5; Yel 9:23-24; 2Ko 6:10 g 1:10 1Ti 6:17; 1Fi 5:5; Lu 12:16-21 h 1:12 Dan 6:1-28; Ye 5:11 i 1:13 1Ko 10:13

ana nuwanuwa hidede amine. Hai kaliva tauna yana nuwanuwa ita'italuvadigana koyona againe ginataini-yo agena ginavebahina, medema ana egana aladibidibi. <sup>15j</sup>Au yana nuwanuwa koyona ginavehifuga tu muliya dewa koyona ginavenatunena. Ada dewa koyona ginalakata meda ginavenatuna natudi ana egana alika.

<sup>16</sup>Tobohiyanuwakweyao, keke wananuwanuwafani vaita Yaubada gida'aladibidibiyemi. <sup>17</sup>Bana Yaubada abaveluga moya'aina kadu gaitoma haghagidiga ana Tovetala. Gaitomai-dina inubadi lobameya, ada Bana Yaubada lobama ana mahala adi To'aibubuna amanadi mena nuwakabubu tulina tulina givetalaiyena. Bana ana ita keke gidakivilani. Kauwana againe ai aiwa'udi malalauga lakahina tu uyadayada kabi'ona. Tu Yaubada keke aiwa'u amine. Yana mahalina keke kivilavilana, au ana ita'ita sa'eyana. <sup>18k</sup>Yaubada nuwanuwana amine Bana bonana againe katubuga-havagi ada yawaida ivaguna bonai-nadi againe give'inuba. Bonai-nadi au nuwanuwa velemo'ena. Au hidedemi katubuvagu be higa yana aibubuna matatabuna agaidiya ide vaita bavagu haghagi-mo'ena amine wai kanagona Bana matane.

**Yaubada bonana keke vaita nogalagaga fa'ina, au idibumuhiga buye'i.**

<sup>19-20l</sup>Siule tobohianuwakweyao, hida gahe againe nuwami ginanauna. Moya'aimi gilubodami be maduvanenea againe wana'ihokohoko tu madugahe be madunuwakoyo againe wana'i'abobowa. Fa'ina kaliva yada nuwakoyo keke-mo'a yada dewa gina'ihaghagiyeni Yaubada nuwanuwana amine. <sup>21m</sup>Yaubada nuwanuwana dewa yegayegana fa'ina, nuwanuwa bwanebwanenena kadu dewa koyona tulina tulina gikabu-fa'ila ma wanavenikohiyedi, ada yami wanuwahobu Yaubada againe wanahawahegemi be bonana nuwamiya gifahana-ma wana'abina, bonai-nadi anafaiweya ginakibababalemi.

<sup>22n</sup>Tu Yaubada bonana ana venogala fa'ina ganagahe. Ka'i Bana bonana nogalagaga amine wanahuluvina au taumiyao agaimiya wave'alololo. Au gilubodami be gavaimi gigahe medema wana'idibumuhigena. <sup>23-24</sup>Hai kaliva Yaubada bonana ginogalina tu gavaimi gigahe-ma keke gidahuluvini, medema vaita kaliva kelasi againe anununa gida'itamata'idileni. Gi'ita-yo auhe'ama gina ada anununa gavaimi ana ita ma nuwana giulu. <sup>25</sup>Atu hai kaliva Yaubada yana vehimeya againe gina'itadonadona kadu yana ita ginanunauwena be gavaimi gi'itana o ka'i ginogalina-ma keke nuwana ginaulu tu tova moya'aina gina'idibumuhigena, medema yana havivila moya'aina agaidiya Yaubada yana nuwakabubu gina'ayaunena. Mena Yaubada yana vehimeya

j 1:15 Lo 6:23 k 1:18 1Fi 1:23; Yo 1:12-13 l 1:19-20 Gah 10:19; Md 5:22 m 1:21 Kl 3:8  
n 1:22 Lo 2:13

hagihagi-mo'ena ada ana idibumuhiga againe ide kaliva yauyaugideyao ma ka'ayaunena.

<sup>26</sup>°Hai kaliva ginuwanuwa vaita bana totafalolo tu yana meyafato'ai keke gidahawahawatani, medema yana tafalolo vaita gaitoma-kawowo ada tauna againe give'alololo. <sup>27</sup>°Hai kaliva yana tafalolo mahamahali-mo'ena kadu keke ma'ita koyona Yaubada Tamada matane, medema yana huluva hidede amine ginaseyemaunena. Natu'aeda sikwasikwa yadi wa'ase'u'aulolo himimiyami-ma gina'itave'avidi, kadu tauna yana huluva gina'itave'avina be tomiyababi Yaubada hivenikohiyena-ma yadi dewa koyona keke bana againe ginadamana fa'ina.

**Keke kaliva tufoidi kana'italakalakavedi tu  
tufoidi kana'itahobuhobuyedi.**

**2** <sup>1</sup>°Tobohiyakweyao, omi yada Kaiwabu Yesu Keliso ana tovetumagana, Bana'e yana wamahalina ve'akinamanamalina ma kalivai-nadi. Omi tovetumagana keke kaliva adi ita againe wanalagadi, au wana'itadi leleleya. <sup>2</sup>°Wa'ita, ka'i wakalivana ana wavaigau fatadi lakahina kadu ana wanimakwasi gola fatana lakahina yami manuwatafalolo againe ginaluku, kadu koyokoyo ana wavaigau koyona ginaluku, gavaimi wanahuluvidi? <sup>3-4</sup>°Ka'i wakalivana yami wave'amohimohina wanagahena wanagayo, “Kumani, hidei abavetoga hagihagina, au uhiyoto.” Tu ka'i koyokoyo wanagahena wanagayo, “Mene umidi,” o ka'i “Hidei efe'efeya agekuya uhiyoto.” Ka'i mededemi wanahuluvidi, au adi ita againe ahe walagadi vaita yo'lo luhei agaimiya hidamiyami, sa'eyana kikaiwabudiyao sa'eyana fanifanidiyao, kadu omi to'ailaga taumiyao wakilakahimi au hida yami inuba koyo-mo'ena.

<sup>5</sup>°Tobohyanuwakweyao, wanogali! Yaubada badi koyokoyo tomiyababi matadiya giluwafadi be keke lokoloko againe tu yadi vetumagana againe hinakaiwabu kadu Yaubada yana abavehimeyeya hinaluku-yo yana itave'avina againe hinamiyami. Tuwai-mo'ena Yaubada badi Bana againe hinuwanuwa-ma hidedemi adi du'u fa'ina giwonadabedabedi. Mena koyokoyo adi lauwafa ma'i wanuwenuwena o ka'i keke? <sup>6</sup>°Tu omi'iyao ma koyokoyo wa'ihawadamanedi. Gavaiyami? Mene gaveyao hikikivekoyomi-yo kotu againe hisimadumadugemi? Me kikaiwabudiyao. <sup>7</sup>°Wona velemona badi kikaiwabudiyao mena kalivai-dina yami Kaiwabu hihawahawatagona, Bana'e ana egana kikaiwabuna omi wawahina amanadi.

<sup>8</sup>°Gilubodami be yami Kaiwabu yana vehimeya lakahina wana'itave'avi-mo'ena. Vehimeyai-nadi Veyao Tuwaina ana bukiya gidadauda gigayo,

---

° 1:26 Sam 141:3    P 1:27 Ais 58:6-7    ¶ 2:1 Af 10:34; 1Ti 5:21; Ye 2:9    † 2:3-4 Yo 7:24  
s 2:5 Md 5:3    † 2:6 Af 16:19

Tauni unuwakabubuye amine, tobohiya unanuwakabubuyena. <sup>9</sup>Atu ka'i kaliva adi ita againe walagadi tu keke wada'itadi leleleya digo, omi vehimeyai-nadi ahe wayawelina ada omi vaita vehimeya ana to'aiyawela yami wakoyona Yaubada matane. <sup>10</sup>Wa'ita, gava kaliva Yaubada yana vehimeya matatabudi gina'itave'avidu tu vehimeya sa'eyanaga againe ginakali'uhoo, medema ana wavita vaita vehimeya matatabudi gidayaweli-'owodi. <sup>11</sup>"Ide kahalamanena vehimeya matatabuna kayaweli-'owona fa'ina Bana Yaubada gigahe gigayo, "Keke una'udo," kadu Bana Kalivai-nadi gigahe gigayo, "Keke unaluve'alika." Ka'i keke wada'udo tu waluve'alika, au ami egana vehimeya ana to'aiyawela.

<sup>12-13</sup>"Medema fa'ina yami gahe kadu yami gugai wana'itave'avina. Aimo tova mulina Yaubada kaliva moya'aida ginavedewayaugida. Ka'i keke kaliva kadahinekalikaliyedi digo, kadu keke-mo'a Yaubada ide ginahinekalikaliyeda. Atu ide gaveyao Bana againe kahawahegeda-yo yana vehimeya tobohiyadeyao adi nuwakabubu fa'ina ka'ita'itave'avina be vehimeya ana idibumuhiga againe ide kaliva yauyauyauyau ma ka'ayaunena, medema Yaubada ginahinekalikaliyeda. E, vedewayauga ana toveya keke matahiwadi fa'ina kanamatauta, au yada wavemwamwala Yaubada yana hinekalikali kananuhagana. Au hidedemi hinekalikali matahiwadi gitubutagona.

**Omi tovetumagana keke vaita vetumaganagaga,  
au yami wa'igibagiba buye'i.**

<sup>14</sup>Siule tobohiyakweyao, ka'i tamo hakwadi ginagahe ginagayo, "Iya Yaubada againe gavetumagana," tu yana vetumagana keke igibagiba againe gidaseyemauneni, au hai ana yamumu? Keke. Ka'i mene yana vetumagana againe ana kibababala ginanuhagana? Keke, keke-mo'a! <sup>15-16</sup>"Wa'ita, ka'i tobohiyami o noumi sa'eyana Yesu Keliso yana yo'o agaidiya ana kaleko keke fa'ina givewavekwadudu o ka'i mafu gilaulauna tu omi wanagahena wanagayo, "Siule, Yaubada ginanuwakabubuye. Keke unavekwadudu au a'a una'a be una'ahiyauwa." Ka'i hidedemi wanagahe tu keke wowona ana gaitoma againe wanavelugani, yami gahe gahegaga. Au hai ana yamumu? Keke. <sup>17</sup>Meda anafaiweya ka'i yami vetumagana vetumaganagaga tu keke igibagiba againe wadaseyemauneni, au yami vetumagana gaitoma-kawowo.

<sup>18</sup>Tu tamo hakwadi ginagahe ginagayo, "Kaliva sa'eyana yana wavetumagana tu sa'eyana ma yana wa'igibagiba." Ada iya ganabonalaufata ganagayo, "Ka'i keke kaliva agaidiya una'igibagiba, gavaiya'amine o ya wavetumagana velemo'ena unaseyemauneni? Tu

iya'eku ma yaku vetumagana yaku igibagiba againe ganaseyemaunena.”  
 19 Wa'ita, omi wanuwawuwa vaita vetumaganagaga gilubodana be wagayo, “Bana Yaubada anakaibe'u-mo'a.” Au yamumuna tu'ena balauma koyodiyao meda Yaubada anakaibe'u-mo'a amine hivetumagana. Yaubada hivetumaganena tu keke yana nuwanuwa amine hidahawahegedi fa'ina yadi vetumagana yadi wamatauta buye hivetavetatava.

20 Siule kaliva kwavakwava! Gava tova-yo unahalamaneni vetumaganagaga tu keke igibagiba buye'i ma gaitoma-kawowo? Unogali, iya ganavehawale. 21 xNagona bwaneneda Abelhamo againe ganalufefosena. Natuna Aisake Bana Yaubada againe gihawahegena higa abaveyao amine atudidigeya gidamununa fa'ina Yaubada Abelhamo ginuwenuwena vaita yegayegana Bana matane. 22 Ka'i mene nuwa a gimahalina? Bana yana wavetumagana kadu yana wa'igibagiba buye gififaisewa. Yana igibagiba againe yana vetumagana ana abalauyabu giseyemaunena. 23 E, Abelhamo yana igibagiba Aisake ana hawahega againe giseyemaunena. Ada gahe sa'eyana Veyao Tuwaina ana bukiya gidadauda-ma mena Abelhamo yana igibagiba againe ahe gilakayemu velemo'ena. Gahe-nadi gigayo,

Abelhamo Yaubada givetumaganena ada yana vetumagana fa'ina  
 Yaubada bana fa'ine gigahe gigayo, Bana kaliva yegayegana Iya  
 matakuya. Ada au Yaubada Abelhamo givewagana ana kusebo.

24 Mema au wa'itana keke kaliva yada vetumaganagaga tu yada igibagiba buye'i fa'ina Yaubada giseda yegayegadeyao Bana matane.

25 yMeda anafaiweya badi vineYeliko kwamayoku yamayamadadadi ma adi egana Leyabi yadi vetumagana yadi igibagiba againe hiseyemaunena. Hidema fa'ina Yaubada gisedi yegayegadi Bana matane. MiIsileli Yeliko ana fafaliya hiyemu-yo tolauyavaga adi'iselu hi'iveninisedi tu badi Leyabi yadi manuweya hivega'auledi. Au muliya mali edeya hi'atuhegedi tu nibaidiyao hi'ai'ava.

26 Au mema wa'ita, kaliva wowonaga tu alu'aluwana keke, medema kaliva ali'alikana. Meda hai vetumaganagaga tu igibagiba keke, medema vetumagana ali'alikana.

### Meyada ana itave'avina fa'ina gilukahihi.

**3** 1 zSiule tobohiyakweyao, keke nuwanuwaku kaliva moya'aimi yami yo'o agaimiya Yaubada bonana ana vehawala faisewai-nadi hina'abini. Fa'ina wahalamanena aimo Yaubada moya'aida ginavedewayaugida, ada kaliva-kawowo adi vedewayauga ma'ita ihayana tu ide tovehawala amanadi ada vedewayauga vita-mo'ena. 2 Moya'aida yada dewa againe tova moya'aina katututumadumadu. Hai kaliva yana

x 2:21 Aba 22:9-12; Hi 11:17 y 2:25 Yos 2:1-21, 6:17; Hi 11:31 z 3:1 Af 20:28

gahē againe keke-mo'a tamo koyona gidayakayahini, medema kaliva hagihaginaga higa tauna ana hawata tulina tulina au anafata.

<sup>3</sup>Wa'ita, ka'i nuwanuwada hosi kanavehimeyedi au kainumula kabisona wabulavina awadiya kasena be medema againe yadi naudadana kavehimeyena. Hida kainumula kabikabi'ona nonogana kevakevahala adafaiweya kananagoyedi. <sup>4</sup>Kadu aba'ita sa'eyana ma waka. Waka lakahi-mo'ena ada bolimana toyogina waka gimaduhinehinena tu ana wayaisi kabi'ona againe tovemadu hami nuwanuwana ginana amine anafaiweya waka ginasiviyena. Mena wayaisi kabi'o-mo'ena nonogana tovemadu waka lakahina anafaiweya ginavehimeyena. <sup>5</sup>bMeda anafaiweya meyada talaida kabikabi'ona nonogana gaitoma moya'aina adi faisewa fa'ina anafaiweya giseselakalaka.

Wa'ita, ai yana alavenimoga kabikabi'ona nonogana anafaiweya ubula lakahina gina'alaveyamalelena. <sup>6</sup>cMeda meyada vaita ai'ala'alata amine. Babi ana nuwanuwa koyona tulina tulina meyada gi'iveyemaunidi. Meyada awadeya gidadauda tu guwana koyona wowoda matatabuna againe gisedamadamanena. Mema ai'ala'alata vaita Setani gidakulivenimogini-yo meyada ana ai fifiwalana againe yada miyami matatabuna gikivekoyona. <sup>7</sup>Kaliva adifaiweya kevakeva tulina tulina hina'ivemanavidi. E, kevakeva walawala'a kadu manuga kadu gayagayagidiyao kadu igana ahe hi'ivemanavidi. <sup>8</sup>dAtu meyada ma keke tamo hakwadi anafaiweya gina'ivemanavini. Meyada gaitoma koyona, tova moya'aina gi'eto'etodadana be yana faisewa vaita tuva uyona amine.

<sup>9</sup>Ma meyada againe yada Kaiwabu Tamada kahawadavadavana kadu meyada againe kaliva ka'alatabutabuyedi, badi Yaubada anununa amine gibubudi amanadi. <sup>10</sup>eAwada sa'eyana againe tu hawadavadava kadu alatabutabu giyemuyemu. Tobohiyakweyao, hidedema keke-mo'a gidalubodani. <sup>11</sup>Wa'ita, guya sa'eyana againe keke-mo'a gufa yamumuna kadu gufa lehalehagina ginaguwaleni. <sup>12</sup>Tobohiyakweyao, mani'utu keke anafaiweya nila ginaveguwayeni o maugaya waiwa ginaveguwayeni. Kadu guya lehalehagina keke anafaiweya gufa yamumuna ginaguwaleni. Meda anafaiweya keke-mo'a gidalubodani be hawadavadava kadu alatabutabu awada sa'eyana againe ginayemu.

### Nuwahuya luhei gihawaloveluvedi.

<sup>13</sup>fKai mene tamo kaliva agaimiya yana wanuwahuya kadu yana wavevaisevauya yamumuna? Gilubodana be mena yana nuwahuya yana dewa hagihagina againe gidaseyemaunena. E, yana wanuwahobu bana nuwahuya againe give'inuba-ma gida'ligibagiba yamumuna. <sup>14</sup>Atu

<sup>a</sup> 3:3 Sam 32:9   <sup>b</sup> 3:5 Gah 16:27; Sam 73:8-9   <sup>c</sup> 3:6 Md 15:18-19   <sup>d</sup> 3:8 Lo 3:13  
<sup>e</sup> 3:10 Ef 4:29   <sup>f</sup> 3:13 Ef 4:1-2

ka'i nuwahinagemiya waga'uma'uma wanuwakoyove'ine taumiyao ami egana ana kailakata fa'ina wanuwanuwa, au keke medema fa'ina wanaselakalaka kadu keke yami nuwanuwa koyodi agaidiya nuwanuwa velemo'ena wanahawavekemeni. <sup>15</sup>Nuwanuwai-dina omi wavewagadi nuwahuya. Tu nuwahuyai-nadi keke Yaubada againe gidave'inuba au medema babi ana nuwanuwa, kaliva dibudi koyona ana nuwanuwa ada Setani againe give'inuba. <sup>16</sup>Ka'i kaliva ga'uma'uma kadu taudiyao adi egana ana kailakata ana nuwanuwa againe hihawahegedi, au ve'ataladabwadabwa kadu dewa koyona tulina tulina hi'liveyemaunidi.

<sup>17</sup>Atu ka'i Yaubada ginanuwahuyaveleda, au ana nuwanuwa hidede amine. Nuwanuwa wai ginagona-ma higa kananuwanuwa au haghahinaga. Tu kadu veyaveyaodeyao amine kanamiyami yada huluva bikabikana, tobohiyadeyao adi veluga fa'ina kananuwanuwa, ve'agahegahe againe ve'ahawahawahega amine kanahuluva. Kadu hinekalikali be igibagiba yamumuna agaidiya kanamaga, keke yada wanuwaluga kadu keke yada wave'alololo. <sup>18</sup>Ada gaveyao kukuya hi'ita'itave'avina medema vaita veyao ana tofaha amine, ada aimo guwana hinayaudi ma dewa yegayegana.

#### Yaubada anakaibe againe wanahawahegemi.

**4** <sup>1</sup>Vekwageya ve'amunumunuga agaimiya inubana gavadi againe? Me yami nuwanuwa ita'italuvadigadi wowomiya buye hiveve'asitainemi. <sup>2</sup>Gaitoma tulina tulina nuwanuwami tu keke wadavaidi fa'ina waluve'alika. Mali kaliva yadi giba wa'ita'italuvadigena tu keke amifaiweya wanavaini fa'ina wavebutu wavekwavekwageya buye wave'amunumunuga. Keke Yaubada againe wadave'o'ola fa'ina gavadi yami nuwanuwa keke wadanuhagani. <sup>3</sup>Ada ka'i Yaubada againe wave'o'ola amine keke wadavaini, fa'ina yami wa'inuba tu koyona wave'o'ola be higa taumiyaogaga yami abagakahikahi fa'ina.

<sup>4</sup>Yami dewa vaita kwamayoku moganedi hikiloweni-yo hina nibaineyao buye hi'udo'udo. Omi gaveyao babi ana nuwanuwa koyodi agaidiya wahawahegemi be wavetobohiyanedi, medema vaita Yaubada wavenibainena. Babi ana vetobohiyana anafaiweya Yaubada ana venibaina ma'i wanuwenuwena o ka'i keke? Hai kaliva gihawahegena be babi ana nuwanuwa nuwana gi'abina, medema Yaubada nibaina. <sup>5</sup>Gahe sa'eyana Veyao Tuwaina ana bukiya gidadauda vaita Yaubada nuwanuwa-mo'ena alu'aluwada nuwadeya gisena-ma Bana anakaibe againe kanahawahegeda. Keke wananuwanuwa vaita gahe-nadi gahe-kawowo. <sup>6</sup><sup>k</sup>Nuwanuwana Bana anakaibe againe kanahawahegeda. Gavaimi-yo keke mali nuwanuwa againe tu Yaubada anakaibe againe



kanahawahegeda? Me Yaubada ginafaiwalavele-mo'eda yo alu'aluwada ginanauna Bana againe. Meda yana faiwala ana vetala fa'ina gahe sa'eyana Veyao Tuwaina ana buki againe gidadauda gigayo,

Yaubada toselakalaka givenivenibainedi tu tonuwahobu giveluvelugadi.

<sup>7</sup>Mema au Yaubada yana nuwanuwa againe wanahawahegemi. Setani wanavaga'unaunagena be gina'osemi. <sup>8</sup>Yaubada liline wanayemu tu Bana lilimiya-mo'aya ginayemu. Omi tokoyona nimami koyona againe watunena-ma, nimami wanakolana. Omi tonuwaluga, nuwami wanakiveyeyegana. <sup>9</sup>Yami koyona fa'ina wana'ase'u'aulolo wanatagi'uvami wanalogita. Auwe velaiga vemwamwala tu tagiya nuwavita gilubodami. <sup>10</sup>Taumiyo wanakivenuwahobumi Kaiwabu matane ada Bana ginakilakahimi.

<sup>11</sup>Siule tobohiyakweyao, keke buye wanave'aveyaveyaina. Gava kaliva tobohiyana gihawavekoyoyena o yana dewa gilagana vaita koyona, medema vaita Yaubada yana vehimeya tobohiyada ana nuwakabubu fa'ina gidahawavekoyoyeni kadu vehimeyai-nadi gilagana vaita koyona. Ka'i omi vehimeya walagana vaita koyona, omi keke vehimeya ana todibumuhiga au omi vehimeya ana to'ailaga vaita omi tovehimeya. <sup>12</sup>Yaubada anakaibe vehimeya ana to'aibubuna kadu Bana anakaibe yada dewa ginalagana ka'i hagihagina o ka'i koyona. Bana anakaibe anafaiweya ginakibababaleda o ginaluyawelida. Tu o'eni ma o vaita hakwa'adi-yo tobohiya yana dewa ulaga? Ka'i o tauni Yaubada?

#### **Ide kavevai tu Yaubada anakaibe yawaida givehimeyena.**

<sup>13</sup>Kadu'e wavanenega tu ganagahe. Omi gaveyao wagahe wagayo, “Adamoya o bogiyadi ide kanana hidevama o menevama melalai-nadi againe yada sitowa kanakivemididina, ada medede againe malamala sa'eyana kanamiyami be mani lakahina kananuhagana.” <sup>14</sup>Wa'itami, gavadi bogiyadi ginalakayemu-ma omi keke-mo'a wadahalamaneni. Mene yawaimi ana tunuga wanuwenuwena o ka'i keke? Malalaugeya yagihowa ka'itana tu tova kabisona gi'awowolina amine, meda yawaimi ana tunuga. <sup>15</sup>Au gilubodami be hidedemi wadagahe wadagayo, “Ka'i Kaiwabu ginahawahegeku be wayawaiku ganamiyami amine, hida faisewa o mena faisewa gana'abina.” <sup>16</sup>Tu omi keke Yaubada ana egana wadayakahini, au taumiyo yami vevai fa'ina yami wanuwalaka kadu wagakahikahi. Omi gaveyao au hidede amine wagakahikahiyemi, medema wakoyo. <sup>17</sup>O mene gava kaliva dewa hagihagina gihalamanena tu keke gidahuluvini, medema gikoyo.

<sup>1</sup> 4:7 1Fi 5:8; Ef 6:11-12    <sup>m</sup> 4:11 Lo 2:1, 14:4    <sup>n</sup> 4:13 Lu 12:18-21    <sup>o</sup> 4:15 Af 18:21

**Wakalivadiyao keke folafolakadiyao ma adi laufata gilukahihiyena.**

**5** <sup>1-6</sup> *P*Tu omi wakalivamiyao wavanenega tu ganagage. Yaubada yana vedewayauga ana tova giyemuyemu. Tu omi'iyao ma hida tova ana abalauyabu liline mani giba tulina tulina wa'ive'ave'ahina. Yami miyami hidei babiya ma yami walokoloko wamimiyami. Gavadi gavadi taumiyao yami vemwamwala fa'ina nuwanuwami, medema wavaina. Taumiyao ahe wave'ahiyauwami be agolaufofola ana tova fa'ina au kikidewadewamiyao. Kaliva yadi koyona keke ma tovedewayauga againe wasimanedi be agolaufofola givedi fa'ina mema omi waluve'alikadi, badi keke tamo yadi abafaiwala yo taudiyao hinalugolegole di amanadi. Wa'itami! Tofaisewa yami faheya hififaisewa-ma keke fatadi wadavelevedi. Fatadi keke fa'ina yadi tagi'alawoluolu ma'i wanoganogalina o ka'i keke? Badi yami faha ana toyaudi waveyawai'alagolohidi-ma yadi tagiya Kaiwabu Tofaiwala-mo'a ahe ginogalina.

Medema fa'ina ase'u'aulolo lakahina ginayemaunimi, fa'ina wanatagitagi wanatagitagi taumiyao wanatagi'uvami. Yami giba kikaiwabuna wasenuwauluyena-ma gikoyo, tumotumo ami vaigau hi'ana. Yami mani yami lokoloko wa'ive'ave'ahina be giduva-kawowo ma ahe gikoyo, ada yadi koyo againe taumiyao yami nuwanuwa koyona higa mali kaliva yami kikaiwabu againe keke wadavelugadi-ma gi'iveyemaunina. Au ai'ala'alata omi taumiyao kadu yami kikaiwabu buye gina'alahi-'owomi.

**Yada wa'atuvefa'ila Kaiwabu yana yewa'ela kanalulubodena.**

<sup>7</sup> *q*Tu omi tobohiyakweyao gilubodami be wana'atuvefa'ila wananunauwena tu Kaiwabu yana yewa'ela ana toveya. Tofaha yada aba'ita. Badi tofaha yadi wa'atuvefa'ila wehi fa'ina hiboda tu ahe yadi babi gilugana yadi otova hifahana. Himiyami tu kadu wehi hinafane fa'ina hiboda be a'a ginatabo fa'ina. Lauva tunugina yadi wa'atuvefa'ila hibodaboda tu a'a ma'linuwana ma'linuwana gitabotabo tu muliya guwana yamumu-mo'ena hinayaudi. <sup>8</sup> *r*Meda anafaiweya omi wana'atuvefa'ila ase'ase mi wanakivevatuna fa'ina Kaiwabu yana yewa'ela gilurveda'ufo. <sup>9</sup> *s*Tobohiyakweyao, keke taumiyao agaimiya wana'alawoluolu be higa keke matahiwadi wananuhagani fa'ina. Wa'ita! Tovedewayauga eda'awana liline gimidikebukebu.

<sup>10</sup> *t*Kadu'e tobohiyakweyao, nuwami ginanauna falofita Kaiwabu ana eganeya Yaubada bonana hi'awatalatalainena-ma agaidiya. Badi yami aba'ita vita tulina tulina agaidiya hi'atuvefa'ila amine, meda omi

*P* 5:1-6 1Ti 6:9-10; Mk 4:19; 2Veh 24:15; Md 6:19-21    *q* 5:7 Ga 6:9; Hi 10:36-37

*r* 5:8 1Te 3:12-13; Fl 4:5    *s* 5:9 1Ko 4:5    *t* 5:10 Md 5:11-12

wana'atuvefa'ila. <sup>11</sup> "Yadi eda givita ana toveya hi'atuvefa'ila fa'ina kavewagadi kaliva yadi wavemwamwala. Kadu aba'ita sa'eyana ma Yobi yana wanuwavita lakahina tu yana vetumagana againe gi'atuvefa'ila-mo'a ma valeyana ahe wanogalina, kadu wahalamanena Kaiwabu yana vevai haghigagina Yobi fa'ina kahihina ana abalauyabu. Kaiwabu agobika kadu hinekalikali againe gimaga fa'ina, Yobi nuwakabubu lakahina ginuhagana.

<sup>12</sup> "Tu tobohiyakweyao, huluva sa'eyana giluboda-mo'emi. Wanawonadabadaba againe, keke tamo gavadi kikaiwabuna wanayakahini higa vaita yami wonadabadaba ana kivetoyoga fa'ina. Keke lobama o babi o gavadi kikaiwabudiyao wanayakahidi. Gavaimi wanahuluva ka'i velemo'ena digo, "Ehe" wanayakahina. Ka'i keke wanahuluvini digo, meda "Keke" wanayakahina. Tu keke egana "Tamada" amine wanamaduyakahini be higa mena egana ana aiyakata againe yami gahe ka'i aimo keke wana'itave'avini digo, Yaubada yana matahiwadi keke wanunuhagani.

#### Yada ve'o'ola wavetumaganina fa'ina gilukahihi.

<sup>13</sup> "Ka'i mene tamo kaliva amihinafeya gi'ase'u'aulolo? Gilubodana be gidave'o'ola. Ka'i mene tamo kaliva yana wavemwamwala? Gilubodana be gidakwelidavadava. <sup>14</sup> Kadu ka'i mene tamo kaliva amihinafeya gi'aulolo? Gilubodana be ekelesiya adi tonagona gidakovadi be higa hinave'o'olena ada bunama againe Kaiwabu ana eganeya hinabunamina. <sup>15</sup> Yadi wavetumagana to'aulolo hinave'o'olena ada yadi ve'o'ola wavetumaganina againe to'aulolo ginabwaina. E, Kaiwabu ginasevayawana. Ada ka'i gavadi koyona gifaisewadi, au Kaiwabu ginayawelidi. <sup>16</sup> "Au mema yami koyona taumiyao wanave'a'iyauyauka kadu buye wanave'ave'ove'o'ola be higa aulolo againe yami yamumu wanunuhagana. Hai kaliva yana dewa yegayegana tu ginave'o'ola, medema yana ve'o'ola ana wafaiwala kadu waguwana.

<sup>17</sup> "Wa'ita, bana Elaiya kaliva anafaiweya ide kaliva, ana ayauna meda anafaiweya ide ada ayauna, ada give'o'oladonadona vaita keke ma'ita wehi ginahobu. Ada malamala tohiye kadu hafuna keke-mo'a ma'i wehi gidahobuhobu. <sup>18</sup> Kadu give'o'ola-havagi vaita wehi ginalugaga ada au Yaubada wehi givetalaiyeni-yo babi ana gaitoma moya'aina givebutu gitabotabo.

<sup>19-20</sup> "Kafoi tobohiyakweyao, hida gahe nuwami ginanunauyena. Ka'i tobohiyami sa'eyana Yaubada yana nuwanuwa velemo'ena ana eda ginanufaniyena ada tamo hakwadi edai-nadi againe ginavaiyewena be

<sup>u</sup> 5:11 Yob 42:10-13; 1Fi 2:19    <sup>v</sup> 5:12 Md 12:36    <sup>w</sup> 5:13 Sam 50:15; Kl 3:16

<sup>x</sup> 5:16 1Yn 1:9; Gah 28:13    <sup>y</sup> 5:17 1Kin 17:1, 18:1,42,45    <sup>z</sup> 5:19-20 Md 18:15; Ga 6:1

yana dewa koyona ginavekwaulaugena, mena toveluga bana tobohiyana  
alikeya ahe gikibabalena ada bana tokoyona yana koyona moya'aina  
ana aiyawela ginuhagana.

(Iya Yemesa bonaku.)